

Hochgeachtetä Herr Landammann
Hochvertruuti , liebi Mitlandlüüt
Wertü Gescht

Atraag:

Ich beaaträgä lhnä, d's Strassebuuprogramm 2010-2019 zruggzwiisä, -
(alläfalls understütze ich au dr Abänderigsaatrag Landolt).

Begründig:

Wenni bereits z'letscht Jahr daargleit ha, sind Köschtä für d'Streggi
Näfels-Glaris nach em Netzbeschluss vom Bundesrat, - vum Bund allei
z'träägä.

Mir händ d'letscht Jahr ä zusätzlichä Planigskredit gsprochä – überä
Fortschritt vu dr Plaanig aber, häm'mer bis hüüt nüd vill kört.

Tatsach isch, - dass die aktuell Westumfahrig quer dur verschideni Pri-
vatgrundstügg gaht. D'Plän derzue sind zeichnet.

Leider, - leider – händ's d' Planer verpasst und bis hüüt underluu, au
nur eimal mit de Grundeigätümer z'redä.!

Nüüd füüf Minutä händ sie sich i dä letschtä 10 Jahre Ziit gnuu, um
mit dä betroffenä Bodäbsitzer z'redä.

– **Niemert** hät gfraaged, ob si dä au mit dem Vorgehä iiferstandä siged
und ihrä Bodä abträtted!

„Wänn's nüd wänd – ja, da näm'mer nä halt dr Bodä eifach äwägg“
hätt mä Stimmä kört.

– Mini Damä und Herrä – Das gaht doch nüüd!! – Mir läbed nümmä
1950 – und mir sind doch au nüüd d'China! ä Enteignig isch hüüt
praktisch nümmä mügli. Dr Bund verlangt, dass mer anderi Lösigä sue-
ched.

Ich gseh darum eigentlich nur ei gangbarä Wääg:

Mir müend also die hüüt plaanet Stichstrass, als üseri nüü
Hauptstrass deklarierä.

D'Köschtä derfüür mössti dä dr Bund übernii und mir chented die voragschlagnä Millionä sparä. Nur dur ä söttigs Vorgehä chänted mir dem drohendä Fiasko mit ellälängä Grichtsverhandligä und Prozässchöschtä entguu.

Zudem chämmer üüs die Stichstrass und de zwee Querverbindigä z' Netstal und z'Aennäda ja eigentlich gar nüd leichtä.

Wänn si z'Chliidruggti im Memorial gläsä händ, - werded sie feschtgstellt ha, das mä üüs - schuu liislig - ä Buustüür für d'Finanzierig aadroht.

- Ich wetti darum gärä wüssä, we da dr Sachverhalt isch - und darum bittä ich doch, üserä Finanzminischer, dr Rolf Widmer uf Bühni, damit er üüs über die finanzielli Sachlag Uuskunft giit.

Us dä gnanntä Gründ, mini Damä und Härrä, empfählä ich Ihnä also nuchämal ä Zruggwiisig vu dem 10-Jahresstrassäprogramm, - mit der Uuflaag, das dr Landrat nuchämal über d'Büecher gaat, i dr Meinig Stichstrass und allfällig nötigä Querverbindigä siggid vum Bund z'trägä.

Beschtä Dangg für d'Uufmerksamkeit.

Andreas Schlittler, Glarus